



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

PRESTASI EKONOMI MALAYSIA PADA SUKU TAHUN KEDUA 2025

Malaysia mencatatkan pertumbuhan 4.4 peratus pada suku tahun kedua, didorong oleh penggunaan domestik dan pelaburan walaupun permintaan luaran lebih perlahan

PUTRAJAYA, 15 OGOS 2025 – Keluaran Dalam Negeri Kasar (KDNK) Malaysia meningkat 4.4 peratus pada suku tahun kedua 2025, mengekalkan kadar pertumbuhan yang sama seperti suku tahun pertama. Bagi terma pelarasan musim suku tahun ke suku tahun, KDNK meningkat 2.1 peratus (ST1 2025: 0.7%) pada suku tahun ini. Prestasi ekonomi bulanan masing-masing bertumbuh 4.4 peratus dan 3.3 peratus pada bulan April dan Mei, sebelum meningkat 5.5 peratus pada bulan Jun 2025. Justeru, ekonomi berkembang 4.4 peratus pada separuh tahun pertama 2025 berbanding 5.0 peratus bagi tempoh yang sama tahun sebelumnya. Maklumat ini dilaporkan oleh Jabatan Perangkaan Malaysia (DOSM) dalam keluaran statistik KDNK bagi Suku Tahun Kedua 2025 hari ini.

Menurut Ketua Perangkawan Malaysia, Dato' Sri Dr. Mohd Uzir Mahidin, "Pertumbuhan ekonomi pada suku tahun ini disokong oleh prestasi kukuh dari segi penawaran, terutamanya dalam sektor Perkhidmatan, Pembuatan dan Pembinaan. Ketahanan ekonomi Malaysia dapat dilihat melalui kekuatan permintaan domestik yang berterusan, didorong oleh perbelanjaan pengguna dan pengeluaran perindustrian, walaupun permintaan luar lebih lemah. Dari segi pengguna, pertumbuhan dipacu oleh perbelanjaan musim perayaan dan aktiviti perjalanan yang lebih tinggi, serta pelaburan yang direalisasikan dalam projek berkaitan pembinaan terutamanya pusat data. Gabungan pasaran buruh yang kukuh, kadar pengangguran dan inflasi yang rendah serta bantuan kewangan bersasar telah meningkatkan kuasa membeli isi rumah. Secara keseluruhan, perbelanjaan domestik kekal menjadi pemacu utama pertumbuhan, lantas menjadi asas yang kukuh kepada ekonomi. Namun, keadaan luaran terus memberikan cabaran, dipengaruhi oleh perkembangan tarif yang berterusan serta ketidakpastian politik global yang berpanjangan."

Dari segi prestasi sektoral, sektor **Perkhidmatan** berkembang 5.1 peratus (ST1 2025: 5.0%) pada suku tahun kedua 2025, disokong oleh subsektor Perdagangan borong & runcit sebanyak 4.3 peratus. Peningkatan ini disokong oleh segmen Perdagangan borong (6.1%) dan Perdagangan runcit (3.8%), manakala segmen Kenderaan bermotor pulih sedikit (0.1%) pada suku tahun ini. Selain itu, subsektor Pengangkutan & penyimpanan serta Makanan, minuman dan penginapan kekal memberangsangkan dengan masing-masing bertumbuh 8.6 peratus dan 9.0 peratus, didorong oleh permintaan berterusan dalam segmen muatan serta peningkatan jumlah ketibaan pelancong yang tinggi. Bagi pelarasan musim suku tahun ke suku tahun, sektor Perkhidmatan tumbuh 2.3 peratus (ST1 2025: 0.7%).

Sektor **Pembuatan** menyederhana 3.7 peratus (ST1 2025: 4.1%) pada suku tahun ini, didorong oleh industri berorientasikan domestik, terutamanya Produk prosesan makanan dan produk berkaitan pembinaan. Walau bagaimanapun, pertumbuhan industri berorientasikan eksport menyederhana disebabkan oleh pengeluaran yang lemah dalam Produk petroleum bertapis. Bagi pelarasan musim suku tahun ke suku tahun, sektor Pembuatan meningkat 2.1 peratus (ST1 2025: 1.4%).

Sektor **Pembinaan** mencatatkan pertumbuhan kukuh 12.1 peratus (ST1 2025: 14.2%), mengekalkan pertumbuhan dua digit selama enam suku tahun berturut-turut. Prestasi memberangsangkan ini dipacu terutamanya oleh segmen Bangunan bukan kediaman yang melonjak 17.0 peratus, disokong oleh pembangunan berskala besar dalam projek perindustrian, komersial dan infrastruktur. Ini diikuti oleh Aktiviti pembinaan pertukangan khas (10.6%), Kejuruteraan awam (9.4%) dan Bangunan Kediaman (12.2%). Bagi pelarasan musim suku tahun ke suku tahun, sektor ini meningkat 5.2 peratus (ST1 2025: 1.1%).

Seterusnya, sektor **Pertanian** meningkat 2.1 peratus (ST1 2025: 0.7%) didorong oleh prestasi kukuh dalam subsektor Kelapa sawit sebanyak 5.3 peratus, disokong oleh pengeluaran tandan buah segar. Selain itu, subsektor Pertanian lain dan Ternakan, kedua-duanya mencatatkan peningkatan 2.0 peratus dan 1.5 peratus. Sektor ini meningkat 4.0 peratus (ST1 2025: 1.2%) berdasarkan pelarasan musim suku tahun ke suku tahun.

Sektor **Perlombongan & pengkuarian** menyusut 5.2 peratus (ST1 2025: -2.7%), disebabkan oleh penguncupan dalam subsektor Gas asli (-8.1%) dan Minyak mentah & kondensat (-1.6%), berikutan pengeluaran yang lebih rendah akibat penyelenggaraan yang dirancang. Bagi pelarasan musim suku tahun ke suku tahun, sektor ini terus merosot -5.5 peratus berbanding penurunan -1.9 peratus yang dicatatkan pada suku tahun sebelumnya.

Mengulas lanjut, Ketua Perangkawan Malaysia berkata, "**Perbelanjaan penggunaan akhir swasta** bertumbuh 5.3 peratus, meningkat berbanding 5.0 peratus pada suku tahun sebelumnya. Pertumbuhan ini disokong oleh perbelanjaan dalam Restoran & hotel (14.3%) Pengangkutan (9.4%) dan Makanan & minuman bukan alkohol (4.2%), selari dengan momentum yang kukuh dalam perjalanan, pelancongan dan aktiviti berkaitan percutian. Bagi pelarasan musim suku tahun ke suku tahun, Perbelanjaan penggunaan akhir swasta meningkat 2.1 peratus (ST1 2025: 1.5%)."

Pembentukan modal tetap kasar (PMTK) atau pelaburan dalam aset tetap meningkat 12.1 peratus berbanding 9.7 peratus pada suku tahun sebelumnya, disumbangkan oleh pelaburan dalam jentera & peralatan yang bertumbuh 16.6 peratus berikutan perbelanjaan modal yang lebih tinggi dalam teknologi maklumat dan komunikasi. Selain itu, komponen Struktur bertumbuh 10.5 peratus, manakala Aset lain meningkat marginal 0.3 peratus. Dari perspektif sektoral, kedua-dua sektor Awam dan Swasta menyumbang kepada pertumbuhan pelaburan yang kukuh pada suku tahun ini. Bagi pelarasan musim suku tahun ke suku tahun, PMTK merekodkan peningkatan signifikan 6.5 peratus (ST1 2025: 0.8%).

Beliau juga menyatakan bahawa, "**Perbelanjaan penggunaan akhir kerajaan** meningkat 6.4 peratus (ST1 2025: 4.3%), dipengaruhi oleh perbelanjaan ke atas bekalan dan perkhidmatan. Bagi pelarasan musim suku tahun ke suku tahun, Perbelanjaan penggunaan akhir kerajaan meningkat 1.4 peratus (ST1 2025: 0.1%). Bagi sektor luaran, **Import** menokok 6.6 peratus (ST1 2025: 3.1%) disebabkan oleh permintaan dalam barangan modal yang lebih tinggi sementara **Eksport** bertumbuh lebih perlahan 2.6 peratus (ST1 2025: 4.1%). Ini menjadikan **Eksport bersih** menyusut ketara -72.6 peratus. Pertumbuhan ekonomi Malaysia pada suku tahun kedua 2025 didorong terutamanya oleh penggunaan domestik walaupun permintaan luaran yang lebih perlahan."

Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 197 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.

Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

Embargo: Hanya boleh diterbitkan atau disebarikan mulai jam 1200, Jumaat, 15 Ogos 2025


OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Dikeluarkan oleh:

**PEJABAT KETUA PERANGKAWAN MALAYSIA
JABATAN PERANGKAAN MALAYSIA
15 OGOS 2025**


LAMPIRAN

**Carta 1: Keluaran Dalam Negeri Kasar (KDNK),
ST1 2022 – ST2 2025 dan 2022 – 2024**




Sumber: Jabatan Perangkaan Malaysia

Carta 2: Pertumbuhan KDNK Tahunan, 2000 – 2024




Sumber: Jabatan Perangkaan Malaysia

Carta 3: Pertumbuhan KDNK Bulanan dan Suku Tahunan, 2022-2025




Sumber: Jabatan Perangkaan Malaysia

Carta 4: Pertumbuhan KDNK Suku Tahunan mengikut Jenis Aktiviti Ekonomi, ST1 2025 & ST2 2025




Sumber: Jabatan Perangkaan Malaysia

Carta 5: Pertumbuhan KDNK Suku Tahunan mengikut Jenis Perbelanjaan, ST1 2025 & ST2 2025




Sumber: Jabatan Perangkaan Malaysia

Carta 6: Pertumbuhan KDNK Bulanan Mengikut Jenis Aktiviti Ekonomi, April – Jun 2025




Sumber: Jabatan Perangkaan Malaysi

Carta 7: KDNK Pelarasan Musim
(Perubahan Peratusan dari Suku Tahun Sebelumnya), ST1 2019 – ST2 2025



Sumber: Jabatan Perangkaan Malaysia

Carta 8: Pendapatan Negara Kasar (PNK) Per Kapita, ST1 2022 – ST2 2025



Sumber: Jabatan Perangkaan Malaysia

Jadual 1: Prestasi KDNK Negara Terpilih

Negara Terpilih	2023	2024	2023				2024				2025	
			ST1	ST2	ST3	ST4	ST1	ST2	ST3	ST4	ST1	ST2
NEGARA ASEAN												
 Malaysia	3.5	5.1	5.7	2.7	3.1	2.8	4.2	5.9	5.4	4.9	4.4	4.4
 Singapura	1.8	4.4	1.0	1.3	1.9	3.1	3.2	3.4	5.7	5.0	4.1	4.4
 Brunei	1.1	4.1	0.8	-3.1	-0.4	6.8	7.2	5.4	5.7	-1.3	-1.8	t.t
 Thailand	2.0	2.5	2.7	1.9	1.6	1.8	1.7	2.3	3.0	3.3	3.1	t.t
 Indonesia	5.1	5.0	5.0	5.2	4.9	5.0	5.1	5.1	5.0	5.0	4.9	5.1
 Vietnam	5.1	7.1	3.4	4.3	5.5	6.7	6.0	7.3	7.4	7.6	6.9	8.0
 Filipina	5.5	5.7	6.4	4.3	6.0	5.5	5.9	6.5	5.2	5.3	5.4	5.5
NEGARA LAIN												
 Amerika Syarikat	2.9	2.8	2.3	2.8	3.2	3.2	2.9	3.0	2.7	2.5	2.0	2.0*
 Kesatuan Eropah	0.5	1.1	1.3	0.6	0.2	0.5	0.7	0.9	1.2	1.5	1.6	1.5*
 Sepanyol	2.7	3.2	3.9	2.4	2.2	2.3	2.7	3.3	3.3	3.3	2.8	2.8
 Itali	0.7	0.7	2.0	0.4	0.3	0.6	0.3	0.7	0.5	0.6	0.7	0.4
 Perancis	1.4	1.2	1.4	1.9	1.6	1.6	1.7	1.0	1.1	0.6	0.6	0.7
 United Kingdom	0.4	1.1	0.8	0.5	0.4	-0.2	0.7	1.1	1.2	1.5	1.3	t.t
 Republik Rakyat China	5.2	5.0	4.7	6.5	5.0	5.3	5.3	4.7	4.6	5.4	5.4	5.2
 Republik Korea	1.6	2.0	1.3	1.2	1.5	2.2	3.4	2.2	1.4	1.1	0.0	0.5*

Sumber: Laman web rasmi Agensi Statistik Negara Terpilih

Nota:

% perubahan tahun ke tahun
 * anggaran awalan
 t.t tidak tersedia